



Broj:01-

Datum:

PRIJEDLOG

Na osnovu člana 14. stav 1. Zakona o komunalnim djelatnostima («Službene novine ZE-DO kantona», broj: 17/08), člana 81. Odluke o provođenju izmjena i dopuna prostornog plana općine Tešanj („Službeni glasnik Općine Tešanj“, broj:7a/09), člana 2. Zakona o pogrebnoj djelatnosti i o uređivanju i održavanju grobalja ("Službeni list SRBiH", broj: 5/77) i člana 14. Statuta Općine Tešanj («Službeni glasnik Općine Tešanj», broj: 11/07), Općinsko vijeće Tešanj na svojoj ____sjednici, održanoj ____godine, donosi

O D L U K U

o upravljanju i održavanju grobalja-mezarja na području općine Tešanj

I OPĆE ODREDBE

Član 1.

(1)Ovom Odlukom bliže se propisuje:

- način i uslovi upravljanja mezarijem-grobljem (u daljem tekstu:groblje) i pratećom infrastrukturom,
- održavanje grobalja i pratećih objekata i infrastrukture,
- uređivanje i održavanje grobnih mjesta i nadgrobnih spomenika,
- način i uslovi ustupanja i korištenja grobnih mjesta,
- upis određenih podataka na nadgrobnim spomenicima,
- uslovi i način sahranjivanja,
- ekshumacije posmrtnih ostataka i
- nadzor i završne odredbe.

(2)Odredbe odluke koje se odnose na :

- održavanje grobalja i pratećih objekata i infrastrukture,
- ekshumaciju posmrtnih ostataka i
- nadzor nad primjenom odredaba ove odluke,

biti će detaljnije razrađene ovom odlukom.

Član 2.

(1)Pod grobljem u smislu ove Odluke, smatra se ograđeni prostor zemljišta na kojem se nalaze grobna mjesta, prateće građevine i komunalna infrastruktura, a koje je prostorno planskom dokumentacijom, odnosno Odlukom Općinskog vijeća određeno za sahranjivanje umrlih lica.

(2)Sahranjivanje umrlih lica na zemljištu iz stava 1. ovog člana može početi kada je:

- obezbjeđena dokumentacija u skladu sa članom 7. stav 2.,
- utvrđen upravitelj groblja,
- prostor adekvatno ograđen,
- obezbjeđena cestovna infrastruktura do groblja,
- obezbjeđena ostala komunalna infrastruktura neophodna za ukop posmrtnih ostataka.

Član 3.

(1) Pratećim građevinama u smislu ove Odluke, smatraju se mrtvačnice, prostorije za izlaganje na odar i ispraćaj umrlih, komemorativni centar, prostorije grobnog ureda, cvjećara, sanitarne prostorije i prostorije za radnike.

Član 4.

(1) Infrastrukturu u smislu ove Odluke smatraju se ceste, staze, stepenice, platoi, vodovodna mreža, kanalizaciona mreža, drenažna mreža, rigoli, elektro instalacije, ograde, parkovske klupe, korpe za smeće, rasvjetna tijela, ukrasno grmlje, drveće, sezonsko cvijeće i druga slična oprema.

Član 5.

(1) Grobljem u upotrebi smatra se zemljište iz člana 2. ove Odluke na kome se vrši sahranjivanje umrlih lica.

(2) Grobljem van upotrebe smatra se zemljište na kojem je obustavljeno sahranjivanje jer nema mogućnosti vršenja ukopa zbog prostornih, sanitarnih ili drugih razloga.

Član 6.

(1) Sve odredbe propisane u skladu sa članom 1. stav 2. ove Odluke primjenjuju se i na Vjerske zajednice koje upravljaju mezarijima i grobljima na području općine Tešanj kao i na upravitelja multietničkim grobljem.

Član 7.

(1) Nakon stupanja na snagu ove Odluke a najdalje do kraja 2015. godine, Općina Tešanj će u saradnji sa vjerskim zajednicama i drugim zainteresiranim stranama inicirati rješavanje statusa i načina korištenja postojećih porodičnih grobalja i mezaristana, odnosno ukop umrlih na pojedinačna grobna mjesta na zemljištu u privatnoj svojini, imajući u vidu član 2. ove Odluke.

II IZGRADNJA GROBLJA

Član 8.

(1) Na području općine Tešanj izgradnja novih grobalja predviđena je Prostornim planom Općine Tešanj.

(2) Izdavanje odobrenja za izgradnju, odnosno uređenje zemljišta za potrebe ukopa umrlih lica, podliježe propisima iz oblasti građenja.

Član 9.

(1) Na prostoru određenom za izgradnju groblja, osim izgradnje i podizanja nadgrobnih spomenika, nije dozvoljena izgradnja bilo kakvih objekata koji nisu vezani za korištenje, uređenje, održavanje i upravljanje grobljem.

Član 10.

(1) Groblje mora biti ograđeno ogradom za čiju izgradnju se upotrebljavaju trajni materijali (prirodni ili vještački-kamen, beton, metali i sl.) ili ukrasno zelenilo.

III ODRŽAVANJE GROBALJA

Član 11.

(1) Održavanje grobalja podrazumijeva:

- a) održavanje infrastrukturnih objekata na groblju iz člana 4. ove Odluke;
- b) održavanje pratećih objekata na groblju;
- c) redovno čišćenje, prikupljanje i odvoženje otpadaka sa površina grobalja;
- d) redovno košenje trave na slobodnim površinama grobalja;
- e) redovno okopavanje i orezivanje ukrasnog drveća i grmlja na groblju.

Član 12.

(1) Građani su dužni na groblju održavati potpuni mir i ponašati se s poštovanjem prema umrlim.

(2) Na groblju je zabranjeno:

- a) narušavanje javnog reda i mira prilikom obavljanja sahranjivanja i drugih posjeta groblju;
- b) prljanje grobnih mjesta, staza i cesta;
- c) gaženje preko grobova i izvan staza predviđenih za pješački saobraćaj;
- d) oštećenje i uništavanje ukrasnog zelenila groblja;
- e) oštećenje nadgrobnih spomenika i znakova na nadgrobnim spomenicima;
- f) oštećenje urbane opreme (klupa, korpi za otpatke i dr.);
- g) neovlašteno odnošenje svježeg cvijeća i vijenaca sa grobnih mjesta;
- h) bacanje uvenulih vijenaca, cvijeća i drugih otpadaka izvan mjesta koje je za to određeno;

Član 13.

(1) Grobovi i grobnice na području općine Tešanj koji su proglašeni spomenicima kulture, kao i oni u kojima su pokopane povijesne osobe prema sudu nadležnih institucija, ne mogu se smatrati napuštenim grobnim mjestima, a o njima se brine Općina Tešanj.

IV EKSHUMACIJA POSMRJNIH OSTATAKA

Član 14.

- (1) Ekshumacija posmrtnih ostataka može se vršiti na zahtjev članova porodice umrlog, po službenoj dužnosti kad za to postoje opravdani razlozi i na osnovu odluke suda radi obavljanja uviđaja.
- (2) Članovima porodice u smislu stava 1. ovog člana smatraju se: bračni i vanbračni drug umrlog, bračna i vanbračna djeca, te roditelji umrlog.
- (3) Ekshumacija posmrtnih ostataka umrlih obavlja se u skladu sa propisima koji regulišu ovu oblast.

Član 15.

- (1) Odobrenje za ekshumaciju daje općinski organ uprave nadležan za sanitarne poslove, uz prethodnu saglasnost Upravitelja kojom će biti utvrđeno vrijeme ekshumacije i mjesto pristupa ovlaštenim licima za ekshumaciju.
- (2) Troškove ekshumacije i prenošenja posmrtnih ostataka, ako se vrši po zahtjevu članova porodice umrlog, snosi lice po čijem zahtjevu je odobreno iskopavanje i prijenos posmrtnih ostataka.
- (3) Troškove ekshumacije i prenošenja posmrtnih ostataka, ako je to u općem interesu, snosi Općina.
- (4) Ekshumaciju obavljaju zaposlenici preduzeća registrovanog za obavljanje pogrebne djelatnosti.

V KAZNENE ODREDBE

Član 16.

- (1) Novčanom kaznom u iznosu od 1.000 do 3.000 KM kazniće se za prekršaj Uprava groblja:
 - a) ako kod izgradnje i uređenja groblja ne postupi u skladu sa članom 7. stav 2. ove Odluke;
 - b) ako ne održava groblje kako je to predviđeno članom 10. ove Odluke;
 - c) ako ne obezbijedi provedbu člana 11. stav 2. ove Odluke;
 - d) ako ne utvrdi pravila i ne postupuje po istim u skladu sa članom 19. stav 2;
- (2) Za prekršaj iz prethodnog stava kazniće se i odgovorno lice Upravitelja, novčanom kaznom od 200 do 1.000 KM.

Član 17.

- (1) Novčanom kaznom u iznosu od 1.000 do 2.500 KM kazniće će se za prekršaj pravno ili fizičko lice;
 - a) ako ekshumaciju obavlja suprotno članu 13. stav 3. i članu 14. stav 1. ove Odluke;
- (2) Za prekršaj iz prethodnog stava kazniće se i odgovorno lice u pravnom licu, novčanom kaznom od 200 do 1.000 KM.

Član 18.

- (1) Novčanom kaznom u iznosu od 200 do 500 KM kazniće se za prekršaj fizička lica – građani ako:
 - a) postupaju suprotno odredbama člana 11. stav 2. ove Odluke;

VI NADZOR

Član 19.

(1) Nadzor nad primjenom odredaba ove Odluke vršiti će komunalni, građevinski i sanitarni inspektor svako u okviru svoje nadležnosti.

(2) Organ nadležan za nadzor nad primjenom ove Odluke ima pravo i dužnost da rješenjem nalaže pravnim i fizičkim licima otklanjanje određenih nedostataka i preduzimanje drugih mjera propisanih Zakonom i ovom Odlukom, kao i da u skladu sa Zakonom o prekršajima FBiH izriče novčane kazne izdavanjem prekršajnog naloga, te podnosi zahtjev za pokretanje prekršajnog postupka kod nadležnog suda.

VII PRELAZNE I ZAVRŠNE ODREDBE

Član 20.

(1) Upravljanje i održavanje postojećih mezarja i grobalja na području općine Tešanj vrše vjerske zajednice kojima mezarja i groblja pripadaju, dok multietničkim grobljem upravlja pravno ili fizičko lice, predviđeno Zakonom o komunalnim djelatnostima, kojem Općina Tešanj svojom odlukom povjeri upravljanje, u skladu sa pravilima iz stav 2. ovog člana, koja su dužni donijeti.

(2) Upravitelj groblja (vjerske zajednice kojima groblja pripadaju ili upravitelj multietničkog groblja), dužan je utvrditi pravila i postupati po istim za:

- način i uslove upravljanja grobljem i pratećom infrastrukturom,
- uređivanje i održavanje grobnih mjesta i nadgrobnih spomenika,
- način i uslovi ustupanja i korištenja grobnih mjesta,
- upis određenih podataka na nadgrobnim spomenicima,
- uslove i način sahranjivanja.

Član 21.

(1) Donošenjem ove Odluke prestaju da se primjenjuju odredbe Odluke o komunalnom redu i sanitarnom minimumu („Službeni glasnik Općine Tešanj“, broj:3/10) koje su tretirale ovu problematiku.

(2) Sastavni dio ove Odluke čini Pregled mezarja-grobalja na području općine Tešanj, stanje decembar 2013. godine.

Član 22.

(1) Ova Odluka stupa na snagu narednog dana od dana objave u „Službenom glasniku Općine Tešanj“.

PREDSJEDAVAJUĆI VIJEĆA

Fuad Šišić, dipl.ing.maš

O b r a z l o Ź e n j e

PRAVNI OSNOV

Pravni osnovu za donošenje ove Odluke sadržan je u članu 14. stav 1. Zakona o komunalnim djelatnostima («Službene novine ZE-DO kantona», broj: 17/08), članu 81. Odluke o provođenju izmjena i dopuna prostornog plana općine Tešanj („Službeni glasnik Općine Tešanj“, broj:7a/09) i članu 2. Zakona o pogrebnoj djelatnosti i o uređivanju i održavanju grobalja ("Službeni list SRBiH", broj: 5/77).

O b r a z l o Ź e n j e

Na 11. sjednici Općinskog vijeća održanoj 30.09.2013. godine usvojen je Nacrt odluke o održavanju grobalja-mezarja na području općine Tešanj. Nakon rasprave na Općinskom vijeću usvojen je zaključak kojim se usvaja Nacrt odluke i ista stavlja na javnu raspravu kako bi se kroz javnu raspravu razrješile dileme i postavljena pitanja.

Javna rasprava je održana 21.10. 2013. godine.

U prilogu je izvještaj sa javne rasprave u kome su evidentirane primjedbe i prijedlozi izneseni kroz raspravu.

U cilju evidentiranja trenutnog brojnog stanja mezarja i grobalja na području općine Tešanj, Služba za finansije, privredu, komunalne i inspeksijske poslove prikupila je potrebne podatke sa područja cijele Općine i iste sumirala u Tabelarnom prilogu, koji je sastavni dio ove Odluke.

Prema prikupljenim podacima na području Općine egzistira ukupno 349 mezarja/grobalja (vjerskih zajednica i privatnih) od čega je 316 u upotrebi.

U ukupnom broju mezarja/grobalja privatna su 174, od čega je u upotrebi 148. Preostalih 175 su mezarja/grobalja kojima upravljaju vjerske zajednice i buduće multietničko groblje, od čega je u upotrebi 168.

OBRADIVAČ

Služba za finansije, privredu, komunalne i inspeksijske poslove

Hamzalija Hojkurić, dipl.ecc.

OPĆINSKI NAČELNIK

Mr. Sc. Suad Huskić, profesor

Broj:02-02-1-1250/11

Dana:16.12.2013. godine